





HISTOIRE

ESPOVVANTABLE

& cruelle d'un ieune homme de
Prouence, lequel ayant tué sa
mere, fust par punition diuine
estranglé du Diable. le 27.
Septembre. 1621.



A LYON,

Iouxtela coppie Imprimé à Aix Par
Iean Tholouzan.

MDCXXI.

Auec permission.

Case
F

HIS TORE

39

326

1621

THE NEWBERRY
LIBRARY

NOTA

Library of the University of Chicago
Chicago, Ill.

1711

1711



HISTOIRE.

ESPOUVANTABLE ET
cruelle, d'un ieune homme de
Prouence, lequel ayant tué sa
mere, fust par punition diuine
estranglé du Diable,



Es tragiques cruauitez
n'ont iamais demeu-
rées impunies, le Ciel
ne pouuant souffrir,
que les desnaturé bar-
baries, des homicides inhumains,
puissent durer sans ressentir les ef-
fects d'une iuste punition : leurs
mal-faïcteurs ayans beau fuir, ou se

cacher dans les entrailles de la terre,
non pourtant ils ne peuvent euit
l'arrest & definition de la iustice di-
uine, ou humaine. Cestuy-cy, du-
quel l'horrible peché faict rougir
l'ancre de ce discours, en pourra
acertener les effroyables recits, puis
qu'il est certain que depuis peu de
iours il est venu au notice de plu-
sieurs personnes dignes de foy, &
estant natif de la ville d'ou sortit
c'est instrumēt des faries infernales
Gaufredy, duquel vn chacun scait
l'endiablée rage de sa vie. Je le di-
ray estre l'vn des rejettons de sa
meschanceié, puis qu'il commist
l'acte le plus cruel qui se soit per-
petré en nostre temps, & duquel
la posterité pallira au recit de l'e-
normité d'un tel crime.

Ce ieune homme estoit fils vni-
que de sa mere (pour lors vefue) le-
quel de son bas aage fut esleué avec
toutes les mignardises & passe-
tèps d'ou elle le pouuoit entretenir,
n'ayant rien de si cher au monde
que c'est enfant, c'estoit son paradis
en terre, estimant selon son fol ad-
uis qu'il seroit l'appuy & baston de
sa vieillesse, bref c'estoit ses yeux
mesmes, & le mouuement de son
cœur, ne se plaissant qu'à luy don-
ner toutes sortes de delices, en for-
mant par ses esbats la perte d'ell, &
de son enfant, sans pouuoir cōpren-
dre (tant l'amour qu'elle luy por-
toit l'auengloit) ce qui reussiroit
de ces débordées licences? elle luy
dōnoit d'argent pour faire des de-
bauches, luy laissant escouler son

tendre aage en toutes prodigalitez
& folies, au lieu de luy faire ensei-
gner les mœurs par lesquelles l'on
marche au chemin de la vertu Ha!
merce qu'il eust mieux valu luy faire
sentir les verges d'un maternel cha-
stiment, que les vanitez des mara-
stres douceurs. Je ne t'accuse pas de
trop d'amitié mais ie t'accuse de
l'auoir employée pour sa ruine, &
ta confuse infamie. Il faillloit brider
ces desfreiglées passions, & retenir le
frain de ces desordonnez appetits,
pour luy faire paroistre deuëment
ton amour: estans ou deuant estre
telles les loix de nature.

Or pour reprendre nostre dis-
cours, ayant ataint l'aage de dix &
sept ans, il commença à frequenter
plusieurs meschans garnemens, ou
il viuoit

7
il viuoit comme dans son Esleuiens
soit en tauernes, debauches, ieux
de cartes & dez, comme en toutes
sortes de vilennies & meschaneetez
il n'y auoit tromperie qu'il ne com-
mist, & mesme si l'on deliberoit à
faire vn mauuais coup, c'estoit ce-
luy qui en donnoit la conclusion,
& qui en mesme temps executoit
l'entreprise. Il n'y auoit maison de
ioye ou bourdeau qu'il ne frequen-
tast; mais comme toutes ces choses
ne peuuent se faire, sans qu'il y aille
beaucoup d'argent, & encor que sa
mere fust riche, & qu'elle l'aymast
extrememēt, si est-ce que cognois-
sant que la despēce de son filz dimi-
nuoit beauacoup ses biens, vn iour
(mais trop tard) voulut luy vser de
quelque remonstrance, pensant

par icelles le diuertir de ces dete-
 stables façons de viure, mais cestoit
 proposer de blanchir vn More, &
 d'arrester l'instabilité de l'Ocean,
 car au lieu de receuoir ces repri-
 mendes à gré, pour corriger son
 vice, ce fust à s'agit de menaces
 contre sa mere, accompagnées de
 mille iniures, & voyant qu'elle ne
 luy donnoit plus d'argent sans se
 courroucer aigrement contre luy,
 il se faschoit estrangement pour
 luy en demander, l'occasionnant à
 cela l'inaccoustumée cholere de sa
 mere qui l'auoit tousiours entretie-
 nu parmy des douces paroles &
 trop grandes priuantez. C'est icy
 ô peres & meres, ou il faudra re-
 marquer qu'elle recompence eust
 costé icy, pour auoir popiné & ama-
 doué

doüé si chèrement c'est enfant au
succe de la nourriture, & combié
d'autres pour auoir ainsi failly &
donné trop de liberté aux leurs, les
ont conduicts en des fins deplora-
blement tragiques, & au regret hō-
teux & confus de leurs parens, qui
vous peut dōner exemple d'ancā-
tir toutes les flateries que vous
pouuez faire, au curieux entretiens
de vos enfans, & plustost les dete-
nir estroictement que de lascher la
bride à leur effrenée ieunesse, la le-
cture de ce veritable discours vous
en pouuant donner enseignement.
Car ainsi comme ce ieune homme
continuoit en ces extrauagues de-
bauches, il despensoit encor plus
extraordinairement d'argent qu'il
ne souloit, i'entrans d'aduantage

B

au dedalle de ses concupiscences, &
 abominables vanitez, cause entie-
 re de sa perte. Car estant vn iour
 dans vn cabaret avec trois ou qua-
 tre de ses confederez patriottes,
 ils commencerent à demander des
 cartes, les ayans se mirent à iouer
 vn bon nombre d'argent, que
 c'estuy cy pert, apres celuy d'au-
 tre, iusque à s'engager d'vne gran-
 de somme de laquelle se voyant
 importunement sollicité de payer,
 ou de ressentir les effects des me-
 naces de ceux à qui il estoit rede-
 uable, ne scauoit comme faire pour
 auoir de l'argent, car d'en prendre
 de son authorité il ne pouuoit &
 encor moins d'en auoir de gré.
 Tellement que reduict comme au
 desespoir, poussé de son mauuais
 &

& continuel Ange, il prit en resolution de commettre le plus execrable forfait qui fust iamais forgé par les Ministres de l'Enfer. O Dieu? que n'arreste ie icy ma plume sans escrire vn si cruel parricide, quand pour ne le voir, ie croy que le Soleil hasta sa cource, ne voulant assister à vn si mal-heureux spectacle. La nuict doncques venue que le meschât auoit deliberé d'effectuer son pernitiex dessein, il s'en va au logis, ou arriue l'heure du souper s'approchant, & cherchant l'occasion de tuer sa Mere, le voila a l'instant touché de quelque legers repentirs de sa faute, & comme il cōbattoit dans son ame, la table estant couuerte, il s'assit, & tandis qu'il souppoit voila vn bruit qui

s'omeut a la rue de quelques hommes qui se battoiēt les oyāt il se leue, & va ala fenestre pour les regarder, sa mere le voyāt creignāt qu'il ne voulu descendre, le suit pour le retenir, & s'estant approuché de luy mit la teste hors de la fenestre pour voir que c'estoit, mais le bruit estāt asses esloigné de là, ce meschant se ressouuenant de sa maudite proposition & voyant la maligne opportunité de l'accomplir, despouillé de tout deuoir humain, il prit sa mere & rudemēt la jette des fenestres en bas, ou de la cruelle cheute subitement elle mourust, sa cruauté estāt assouuie, il se haste de crocheter les coffres, prenant tout ce qu'il pouuoit porter, tant d'argent que des plus precieux ioyaux, & pensant estre

estre sauue, & gaigner pays, il commence à descendre les degrez, estimant ce perfide desloyal que le iuste Ciel n'eust veu ce forfait, & qu'il n'eut desia enuoyé le bourreau pour executer la sentēce de la diuine iustice. car il n'ira guieres loing (aueuglé de ce cruel homicide) sans choir dans l'abyisme de perdition, puny par la main de Dieu de son execrable peché, laissant aux hommes le cruel resscouenir de sa peruerse meschanceté, Estant donc descendu en bas, il ouure la porte, laquelle estant ouuerte, il apperceu vn homme hydeux, & espouuentable, iettant par sa bouche vne flamme de laquelle sortoit vne puante fumée, portant en sa main vne chaisne de fer ardante,

ayant tout son corps horriblement difforme, lequel s'approchât de luy, luy monstre sa mere morte toute froissée, & couuerte de sang, ce mal heureux n'ose se mouuoir, il tremble, il passit, il demeure immobile, saisi de crainte & de peur, Quand tout soudain ce demon le prenant au coll l'estrangla, & l'enleuant le porta à vne lieue ou deux de là : ou son corps fust treuné par quelque passant.

Voila chers Lecteurs, la fin miserable de ces assouuisseurs de rage duquel l'assassin; & barbare cadaver meritoit vne punitiō, plus iuste laquelle son ame recent parmy les Iustes supplices de l'enfer: & comme nostre esprit ne peut cōprēdre les Indicibles torments dont sont
 pu

punies les ames criminelles, de me-
 sme ne pouuõs nous narrer le cha-
 stiment que recoit ce fauteur, ho-
 micide de son propre sang puis
 qu'estant le fil de sa vie iustement
 coupé de la main du tout puissant,
 son ame (bien qu'immortelle) res-
 sent des morts trop plus cuisantes
 que la mort mesme, & viuant per-
 petuellement en ce martire y il re-
 çoit les miserables, & eternels guer-
 dons, que les faicts de sa mauuaise
 vie luy ont acquis: & cecy pou-
 uant donner estounement, aux
 hommes moins sensibles, aussi en
 peuuent ils voir la verite despeinte,
 au plus bref que i'ay peu, vous ayât
 fait cognoistre comme le tout cest
 passé, en peu de mots aussi certai-
 nement comme la fin en acheue

l'histoire, priant le moiteur de toutes choses, Createur de la machine ronde, vouloir au sein de sa misericorde, retenir le bras de sa Justice, pour ne punir si soudainement, les pecheurs, qui commettent iournellement d'assez suffisants crimes pour faire sortir la main de son iuste courroux du seiour diuin, & sacré de sa grace, de laquelle nous puissions recevoir les doux & amiables effects, pour nous rendre iouissants de sa gloire & beatitude, apres auoir esté exempts en ceste mortelle vie de tous pernitiex encombres, & malheureux accidents, afin que nous puissions iouir de la celeste & eternelle demeure des biens heureux, ainsi soit-il.

F I N.







